

Lavurs ein ella fasa finala

Restauraziun dalla ruina dil casti da Putnengia vegn terminada l'auter onn

DA HANS HUONDER / ANR

■ **Dapi diesch onns vegn fatg lavurs da restauraziun vid la ruina dil casti da Putnengia a Dieni en Val Tujetsch. L'auter onn duein quellas vegnir terminadas.** Sco quei che *Tarcisi Hendry*, il cassier dil Forum cultural Tujetsch, ha detg enviars l'Agentura da novitads rumantscha, succedan uss

aunc lavurs d'allontanament da material sco era la construcziun da mirs e la sanaziun dils mirs existents. Plinavon eis ei previu da plazzar egl intern dalla ruina ina tuor da lenn cun duas alzadas. «En quella lein nus informar egl avegnir davart la historia dil casti e dalla vallada», di Tarcisi Hendry. La finanziaziun dallas lavurs restontas e dalla tuor, calculadas cun ro-

dund 60 000 francs, ei segirada per biebein la mesadad. Ils ulteriurs daners ston aunc vegnir recaltgai. Suenter la restauraziun duei la ruina dil casti survir sco attracziun historica e turistica, mo era per l'organisaziun d'arranschaments culturals. Differentas ideas persuenten existan gia.

> PAGINA 2



Il casti da Putnengia a Dieni ei vegnius construius entuorn igi onn 1200.


FOTO H. HUONDER

■ **Uonn e l'auter onn vegnan las davosas lavurs vid ed entuorn la ruina dil casti da Putnengia a Dieni en Val Tujetsch exequidas. Cumpletada vegn ella d'ina construcziun da lonn cun duas alzadas. En quella tuor duei vegnir informau futuramein cun tablas davart la historia dil casti e dalla vallada.**

Il casti ei vegnius construius entuorn igl onn 1200 entras la claustra da Mustér. Il baghetg principal era circumdaus d'in sfoss e d'edificis secundars sco per exempel baghetgs per ils animals da casa. Ils historichers e perscrutaders dalla Val Tujetsch supponan ch'il casti seigi staus habitaus rodund 350 onns, oravontut dallas famiglias da Putnengia. Da quellas famiglias deriva era il prenci-avat dalla claustra da Mustér, Pieder da Putnengia. Sin fundament d'indezis ch'ei avon maun suppon'ins ch'il casti seigi daventaus l'unfrenda d'in incendi. Schebein quei ei schabegiau durant il temps ch'el era aunc habitaus ni pér suenter sa ins buca. Il casti ei vegnius construius en in dils pli surveseivels loghens dall'entira Val Tujetsch per aschia saver ademplir sia funcziun da controlla. Ins suppona ch'il casti eri habitaus mo la stad. Da cheu anora succedeva l'administraziun uffiziala dil territori tuatschin dalla claustra da Mustér.

Dapi diesch onns alla lavur

Avon exactamein diesch onns ha il Forum cultural Tujetsch lantschau las lavurs da sanaziun e restauraziun dalla ruina. Gia ils onns trenta havevan luvrens dall'anteriura Viasfier Furca-Alpsu exequiu cheu pintgas lavurs da manteniment. «La viasfier sur il Pass dall'Alpsu ed il Furca era vegnida erigida oravontut per intents turistics. Per quei motiv han ils iniziants da lu era vului procurar per atracziuns turisticas e per ina da quellas ta-



Tarcisi Hendry dil Forum cultural Tujetsch ei leds che las lavurs van plaunsiu a fin.

FOTO H. HUONDER

xavan els la ruina dil casti da Putnengia», di *Tarcisi Hendry* ch'ei cassier dil forum. Sut l'egida dil forum vegn luvrau ussa dapi diesch onns bia ni pauc vid la ruina ed era questa stad ei quei il cass. Aschia ei ina grappa dall'Uniun da viandonts Tujetsch segidada l'jamna passada vid lavurs d'allontanament da material e vid la construcziun da canasters da crappa. Ils canasters vegnan erigi leu nua ch'ins suppona ch'ils mirs vegls entuorn il casti eran. El decuors dallas proximas jamnas vegnan ils «viandonts indigens» a semetter per in'ulteriura ga alla lavur. «Nus havein impundiu entochen ussa rodund 120 000 francs ella restauraziun e quintein che 60 000 francs seigien aunc necessaris. Rodund la mesadad da quels mieds finansials ei avon maun, tshels stuein nus aunc recaltgar», punctuescha Tarcisi Hendry.

Il «casti» pren conturas


Grazia allas lavurs exequidas ils davos onns prendan ils fundamentes e mirs aunc existents dalla ruina plaunsiu conturas. Ina buna part dils mirs ei gia sanada. Leu nua ch'els eran cuvretgs cun material curdau dil baghetg cuntengnan els aunc la caltschina originala. La gronda part dil material entuorn ed egl intern dalla ruina ei allontanada. Sco quei che Tarcisi Hendry ha detg enviars l'Agentura da novitads rumantscha ei il nivel oriund dil plaunterren dil casti da pli baul pli u meins contonschiu: «Egl intern essan nus aunc rodund 60 cm pli ad'ault. Il survetsch archeologic cusseggia a nus da schar leu quei material per ina examinaziun. Cheu savess ei esser pusseivel da cattar ulteriurs mussaments davart in eventual barschament dil casti.» Ultra dalla construcziun dils mirs schetgs cun

agid da canasters vegn il sfoss dalla vart dil vest dalla ruina aunc reconstruius. Medemamein ei il material encunter la ruina da lezza vart d'allontanar. Ultra da quei duei l'entrada originala – medemamein dalla vart dil vest – vegnir reconstruida. Ils fundaments cun crappa marcanta ein avon maun. En fuorma d'ina pintga piazza vegn il spazi dalla vart orientala dalla ruina formaus. Cheu suppon'ins ch'ei existevi pli baul in baghetg annex, eventualmein per animals da casa. Sco quei che Tarcisi Hendry sa medemamein da documents avon maun havevan vischins dalla Val Tujetsch fatg diever ils onns 1800 da crappa dil casti per ereger auters baghetgs. Cura ch'ils organs officials han intervegniu da quei ei in scamond per allontanar la crappa vegnius decretaus.

Ina tuor da lönn

Parallelmein cun las lavurs da sanaziun e

restauraziun dalla ruina ei vegniu elavurau in project per ina tuor da lönn. Quella vegn piazzada egl intern dalla ruina e ha pliras funcziuns egl avegnir. «Dad ina vart protegia ella empauet la ruina, da l'autra vart survescha ella sco suttetg per in'informaziun davart la historia dil casti. Cheu lein nus denton era informar generalmein davart la vallada», declara Tarcisi Hendry. La tuor duei consistier da duas alzadas e vegnir cuvretga d'in tetg. La ruina sco tala duei survir egl avegnir era ad arranschaments culturals. Per quei motiv duei igl access tier ella vegnir migliuraus: «Jeu savess s'imaginar ch'ins savess organisar cheu per exempel ina presentaziun da musica e costums vegls da quei temps ni era auters arranschaments da tempra culturala e historica, sco per exempel teaters el liber.» Putnengia ei igl emprem casti sper il Rein. Tenor Tarcisi-Hendry vegn dau peisa a quei aspect era tier ils organs cumpetents dil cantun Grischun.



La skizza dalla ruina dil casti da Putnengia cun la tuor da lönn che vegn construida egl intern da quella.